

**Petikan dari Kitab [Zabur Surah 19](#).**

*Untuk pemimpin muzik. Mazmur Daud.*

- <sup>1</sup>Seluruh langit mengakui kemuliaan Allah;  
dan cakerawala menunjukkan ciptaan-Nya.
- <sup>2</sup>Hari menyebutkan kepada hari;  
malam memberitahu kepada malam.
- <sup>3</sup>Tiada pertuturan atau Bahasa yang tidak mendengar suara mereka.
- <sup>4</sup>Khabar mereka telah sampai ke serata bumi,  
dan kata-kata mereka ke hujung dunia.  
TUHAN telah mendirikan khemah di langit untuk matahari,
- <sup>5</sup>yang seperti pengantin lelaki keluar dari astaka kamarnya,  
seperti lelaki gagah ghairah berlumba.
- <sup>6</sup>Matahari terbit lalu beredar dari satu hujung ke satu hujung langit;  
tiada yang terlindung daripada panasnya.
- <sup>7</sup>Taurat TUHAN sempurna,  
mengubah jiwa.  
Kesaksian TUHAN pasti,  
memberi kebijaksanaan kepada orang yang tulus.
- <sup>8</sup>Ajaran-ajaran TUHAN benar,  
menggembirakan hati.  
Perintah TUHAN suci,  
memberi pengertian.
- <sup>9</sup>Takut akan TUHAN itu murni,  
kekal selama-lamanya.  
Penghakiman TUHAN adil dan benar sepenuhnya.
- <sup>10</sup>Segalanya lebih berharga daripada emas,  
ya, daripada emas tulen;

dan lebih manis daripada madu,  
madu daripada sarangnya.

<sup>11</sup>Dengannya hamba-Mu diingatkan;  
dan sesiapa mematuhinya mendapat ganjaran besar.

<sup>12</sup>Siapakah yang dapat memahami kesalahan sendiri?  
Bersihkan aku daripada kecelaan tersembunyi.

<sup>13</sup>Jauhkan juga hamba-Mu daripada dosa yang sengaja;  
jangan sampai aku dikuasainya.  
Supaya aku bebas daripada kesalahan,  
bersih daripada keingkaran yang berat.

<sup>14</sup>Semoga segala yang kututurkan dengan lidah  
dan kurenungkan dalam hati diterima oleh-Mu,  
Ya TUHAN, sumber kekuatan dan Penebusku.